



11. februar 2014

UPA 2014/189

Inatsisartut suleriaasianni § 36 naapertorlugu apeqquteqaaat aallaavigalugu oqallinnissamik siunnersuut imaattoq matumuuna saqqummiupparput:

**Isorliunerusuni nunaqarfinni nioqqutissatigut, kiffartuussinermi akitigut, aammalu pilersorneqarnikkut akitigut, qanoq oqinnerusumik naapertuunnerusumillu ineriartortitsisoqarsinnaanera pillugu Inatsisartut oqallinnissannik siunnersuut.**

(Inatsisartuni Ilaasortat Knud Kristiansen aamma Gerhardt Petersen, Atassut)

**Tungavilersuut:**

Isorliunerusuni nunaqarfinni innuttaasut atugaat eqqarsaatigalugit, sinerissami illoqarfinnut, nunaqarfinnullu allanut naleqqersuutissagaanni malunnaatilimmik kiffartuussinikkut sullissinerit, aammalu nioqqutissat akii eqqarsaatigalugit, pilersorneqarnerlu annertuumik nikingassuteqarput.

ATASSUT-miit pingaartutut isigaarput, misissussallugu, aammalu oqallisigalugu iliuuseqarfigissallugu suut patsisaallutik, ukiut kingulliit akit ineriartornerat, qaffakkiartornerannut tungaviusimanersoq, tamatumalu saniatigut aamma aningaasalersuinerlut sanillersuullugu qanoq nikingassut annertutigisoq, soorlu sanaartornikkut nunaqarfiit ineriartortitsivigineqarnerat eqqarsaatigalugu.

ATASSUT-miit oqallisigineqartariaqartutut isumaqarfigaarput, nunaqarfinni atugassaritaasut pitsanngorsarnissaannut, periuseq suna atorineqartariaqartoq, aammalu pilersaarutit, soorlu kommuunit iliuusissamik pilersaarutaat ukiuni makkunani naammassineqartut aammalu Namminersorlutik Oqartussat-ni pilersaarutit sanillersuullugit ineriartorneq qanoq isikkoqarsimanersoq, aammalu pisariaqartitsinerup annertussusaa naapertorlugu suliassat qanoq annertutigineri pisariaqarluinnartutut isigaarput.



Aamma ATASSUT-miit isumaqarpugut, suli annertunerusumik kinguneqarnerusumillu iliuuseqarfigineqartariaqartoq ilinniartitaanikkut nunaqarfinni qanoq inerisaasoqarsinnaanera, aamma ilinniartitit ilaatigut immikkortortaarfii suut nunaqarfinni pilersinneqarsinnaanersut, inuussutissarsiutitigut ineriartortitsineq qanoq iluseqartoq, nunaqarfinni atortinneqassanersoq.

Pisortat ataatsimut isigalugu nunaqarfinni kiffartuussinikkut neqeroorutigisartagaat suuppat?, inuussutissarsiornikkut sanillersuussinerit qanoq isikkoqarpat? Kiisalu nunatsinni aningaasatigut kaaviiartitsineq eqqarsaatigalugu qanoq nunaqarfiit pineqartut peqataatinneqalersinnaappat? Apeqqutit tamakku ATASSUT-miit peqataaffigerusuppagut, aammalu ineriartortitseqqinnissami tunngaviulluinnartutut isigaavut.

ATASSUT-miit ilisimavarput, apeqqutit qulequttallu aalajangersimasut kisimik pineqarsinnaanngimmata, aammalu inuttut inuuneq, inuttut inuunerinnermut tunngasut, inuttullu ineriartuutaasunik nunaqarfinni periarfissat piulernissaat annertuumik aamma pissutaaqataammata nunaqarfiit siuariartornerinut, tamatigullu ineriartornerinut.

Misissuinerit aammalu nalunaarusiat nunaqarfiit pillugit nunatsinni annertuumik amigaataapput, kingullerlu : Inussuk Issittumi ilisimatuussutsimik nalunaarusiaq 3- 2013 Kalaallit Nunaanni nunaqarfiit, aningaasarsiorneq ineriartornerlu, soqutigalugu ATASSUT-miit misissorparput, isumaqarpugullu pingaarutilinnik aamma siunissamut annertuumik iliuusaasinnaasunik tikkuussisoq.

ATASSUT-miit oqallittoqarluarnissaanik neriuppugut.